



黑龍江志稿卷三十二

武備志

兵事

勦捕盜匪

清光緒元年五月盜匪孔廣才等糾衆焚燒大小木蘭達陷巴彥蘇蘇襲呼蘭城城守尉成慶敗之

先是同治年間孔廣才與諸游民挖金於吉林樺皮太平各溝每股數十人得金悉交頭目按月均分孔廣才閻兆仁李春等皆頭目也光緒初吉林官兵慮其人衆滋事大舉搜山頗有殺戮衆洶懼乃共推孔廣才閻兆仁李春爲總頭目抗拒官軍五月初旣刦三姓由烏斯渾山裏間道趨松花路經游羅拉密奪

船渡江而北十九日連陷蒙古爾庫富勒渾前協亨各站裹脅日衆進焚大小木蘭達二十二日乃分三股撲巴彥蘇蘇委協領佐領德綳阿嗜酒鄉人報盜者笞逐之前協領富隆阿去任告以巴彥距山近賊窟穴其中宜先事預防德綳阿笑其怯至是倉卒出拒賊賊以一股綴官兵二股分道入城署同知佐領蘇楞額聞賊至索得舊砲數位守其署賊至斃十餘人旣焚協領署蘇楞額力不支衙署亦被焚倉庫軍械悉爲賊據又破獄出其舊黨張中桂等德綳阿退至西集廠二十三日賊撲西集廠德綳阿退至呼蘭所屬之元寶岡子賊遂分掠大荒台元寶岡子王德桂井沈家窩堡將進攻呼蘭城參領成慶時署呼蘭城守尉得制兵八十人率之以行二十四日次羅家窩堡遇賊

賊衆八百人又得巴彥蘇蘇武營軍械子藥輿赴軍前勢張甚陣長三里成慶兩次衝之不稍動自日中相持至夜適賊就車取子藥藥炸震斃賊五六十名馬二十餘匹官軍乘勢促之賊大奔斃賊百餘生擒五名次日收復西集廠及巴彥蘇蘇沿途斃賊二十餘二十六日追至黑山之陽又斃賊三十餘救回被虜婦女五名巴彥武營槍砲悉數奪回餘賊八十名遁入黑山是役也微署尉成慶呼蘭必不支將軍豐紳以聞成慶賞戴花翎巴彥蘇蘇委協領德綳阿署同知佐領蘇楞額署巡檢筆帖帖式色普偵布均褫職八月孔廣才仍竄回江之南攻陷城邑無算至光緒十五年始平

光緒二十六年七月奸民劉振棠據趙胡窩堡恣意擄掠諸生高

玉堂總帶鄉團擊走之

是時俄兵攻呼蘭城劉振棠集無賴三百人號義勝軍盤踞巴彥之趙胡窩堡日事虜掠偵知呼蘭城不守遂大掠楊美尙店城子馮溝望山各屯堡恣淫殺高玉堂呼蘭城諸生以鄉團逐之捕十五人戮以殉劉振棠率餘黨遁去同時有孫本榮者踞施家雙井各堡稱義效軍玉堂編其壯勇者入鄉團餘解散又擊趙胡窩堡二次距匪及武勝門教匪皆敗之

十一月匪首兩響陷呼蘭廳城執協領聶車布同知銘琦

是月初三夜匪首兩響攻呼蘭廳城斃俄兵一人俄隊潰出執委協領聶車布旋釋之質同知銘琦廳民贖金五十贖之歸兩響走大小木蘭達巴彥鄉團曹聖儒躡其後次年正月獲之斬

於廳城

光緒二十七年二月匪首占北入白楊木河

占北有衆八百人據白楊木河巴彥練紳李廣大禦之賊僞退廣大渡河追之賊據上風奮鬪復以別隊斷其歸路廣大退踞民舍拒守被圍兩晝夜糧盡援不至死者三十人餘衆二百二十八人俱被執鄉人江上以金三萬六千贖歸之

三月高玉堂擊匪於張達井小榆樹各屯皆破之

是時劇匪薄洛五據張達井陶四機匠據陶堡丁洛疙疸據小榆樹王三老虎據福昌屯各有衆百數十人高玉堂督李伯荆湯福聰陶發林李希聖方懷德各團擊破之誅其渠散其脅從自是呼蘭城屬無匪匪悉萃於巴彥

是年春副都統倭克津泰擬練鄉團治盜俄不允

呼蘭副都統倭克津泰以屬境多盜擬練鄉團使高玉堂商於哈爾濱俄官俄官不允執之擬以劍且絕其飲食玉堂不爲撓義而釋歸

四月十七日盜匪占北入巴彥焚同知署襲俄兵營

占北盤踞大青山蒙古爾山羣匪悉歸之山前後數百里無人烟四月十七日突入巴彥襲俄兵營同知銘琦傷足署被焚

五月占北掠巴彥北境練首張永貴擊卻之

是月朔占北掠東阿力罕牌戕鄉練劉萬才二十餘人遂趨北甘沐林子練首張永貴五分其隊禦之初三日張廣玉斬悍目全勝占北大憤次日晨壓劉家小鋪而陣執旗麾賊衝會兵爲

二遂圍張永貴張廣玉登高望賊見之以壯士八十人突圍拔張永貴出整隊復戰前仆後繼槍聲日夜不絕賊死傷百餘人練勇傷亡數十人會北林子管帶懷塔喜以俄兵至發大炮轟賊賊始遁張永貴巴彥人驍勇善戰其名亞於高玉堂玉堂聞永貴被圍率團千人越境會勦至則圍解乃分駐泉眼河東西阿力罕勸諭壯丁練團自衛占北黨洪福燕有衆三百人欲約降玉堂單騎往說之其黨皆解散

是月倭副都統商准駐巴彥俄官團練鄉兵勦辦土匪未幾俄官入奸民言圍鄉團虜槍械並將倉官尙福送哈爾濱下獄旋釋之歸我槍械

副都統倭克津泰檄倉官尙福赴巴彥協同文武官吏詣駐巴

彥俄官阿力不羅夫四吉伊謀練鄉團治土匪阿力不羅夫四吉伊忱於四月之變允我團練鄉兵惟須俟哈爾濱俄提督命阿力不羅夫四吉伊去任代者爲吉明戒夫入奸民言圍捕鄉團傷我兵十餘人執二名虜我槍械四百餘件六月以馬步兵衛送尙福於哈爾濱下之巴釐司名俄獄鞫無別情乃謝尙福歸之並歸我槍械

六月占北分竄北林子巴彥境巴彥練兵擊走之

占北自趨北林子至餘慶南界巴彥練張萬林擊之斃賊十一人其南出者劉英張湖李雲山敗之於大石頭河又敗之於土門子斬其悍目靠山東路之賊至谷家油房爲張殿文張鑑堂所敗

七月占北擾巴彥渡泥河高玉堂張永貴懷塔喜合軍敗之

占北攻西包寶山十三日進至少陵河爲張永貴所扼占北謀
攻破北路練兵徑趨北林子會河下江賊郝天波黨千七百人
分三隊以進張永貴亦分三隊應之相持旬日張永貴以賊衆
練寡告急於各路團防懷塔喜以北林子防營至高玉堂宋祿
以呼蘭團練至占北旣不得逞乃西北行趣泥河至拐壩橋倉
卒未及渡懷塔喜高玉堂宋祿張殿文各軍奄至占北返鬪死
咋不退悍目雙魁以驍勇聞於賊中斃於砲賊氣遂奪我軍大
呼乘之又斃悍目三十餘人占北逃遁歸青山老巢

十月高玉堂張永貴合兵扼賊於青山占北窮蹙遂降東荒一律

肅清

占北既遁歸仍踞守大青山及蒙古爾山高玉堂張永貴犄角扼之三閱月賊不敢出糧盡勢蹙欲降懼見戮乃約降於吉軍統領金得鳳道遇俄兵執之流於四合林餘黨胥解散東荒一律肅清將軍程德全錄團練功玉堂以府經歷用張永貴以把總用李樂山以外委用

李樂山與姜廷牙站守呼蘭河西至數十站

人樂山之俄官幾賴於高卒玉堂奉副都統倭克津泰之命以鄉團事商之俄官幾賴於高卒玉堂奉副都統倭克津泰之命以鄉務農不費國帑而外堅全邦交內除氣悍寇以措風柱危局至二三年之久其堅苦勇敢之氣足風矣

光緒三十二年二月盜匪入蘭西境

是時羣盜復起二月晦匪首兩響

盜匪綽號多相同非

糾夥七

十餘人撲蘭西縣正藍旗三界練會焚會房戕兵民五人傷四人

三月十一日盜匪李蒙古糾夥四十人俄匪五名掠蘭西北鄉會
隊營警合擊敗之

三月二十八日馬賊山崩黑字七十餘人襲據蘭西北武家窩堡
管帶富昌保合鄉團

團首爲姜朝鳳崔永
和楊永升白萬昌等勦之

三月匪入呼蘭境管帶傅岐標敗之

賊首東洋樂大股竄入呼蘭之小房身屯傅岐標敗之擒匪首
奎有大有字

四月匪分入呼蘭蘭西巴彥營與團防合擊敗之

四月初二馬賊四十餘人掠蘭西之葛家團子路總車式文景
泰杜萬祿以馬隊三十名會俄官格爾久克及富昌保馬隊擊
之斃匪二十餘名路總崔永和獲砲頭曹清海是月盜首趙長

發糾夥三十餘人犯巴彥之三河堡哨官李永珍獲其黨趙東發送州誅之東洋樂會合匪首猛著幹犯呼蘭之白家亮子傅岐標敗之又敗他股賊於二道溝子

五月東霸天犯綏化團防會軍隊擊斬之山崩入蘭西爲防營所敗

是月賊首東霸天等迭犯綏化通肯境巴彥團總曹福陽以馬步隊一百二十人躡之合綏化兵百五十人敗東霸天於三道烏龍河斃賊八名又敗之坤字四井斬東霸天並悍目魁字餘賊遁入民房吉安軍統領苑春華綏化管帶懷塔喜之兵續至環而攻之日暮大雨賊穴牆遁去二十五日山崩大擣字猛著幹各股復竄蘭西趙家窩堡苑春華恒玉富昌保協同俄隊擊

卻之擒斬無數山崩北竄張家燒鍋統領吉祥復敗之斃匪二十六名

六月東洋樂擾呼蘭山崩擾蘭西

是月十四日東洋樂率其黨八十人竄入呼蘭之五站統領吉祥以全隊蹙之匪匿江沿柳叢獲免二十五日山崩俏字竄入蘭西隋家屯巡目張福陣亡並戕防兵二人傷四人

七月東霸天餘黨合天滅洋戰北各股攻巴彥州防營鄉團擊破之

悍匪小勝子父事東霸天巴彥團總曹福陽追斬東霸天於坤字四井小勝子痛之誓復其讐糾合餘黨並巨匪天滅洋戰北各股得一百五十餘人謀撲巴彥州七月初四日由間道竄入

哨官杜國祥偵知以八十人伏金家岡突擊之賊駭走道員慶
山管帶傅岐標兵亦至初五日追至王二拉廟敗之又敗之於
猴石初六日賊東竄大木蘭達欲南渡江不果復東竄五站哨
官王振川任士魁以保甲兵扼白楊木河口賊不得渡復折入
巴彥州境初九日路總張殿文李文成邀之穿心林子斬匪首
戰北天滅洋以五十餘人奄至腰擊我軍我軍失利巡防右軍
哨官慶春聞警馳救天滅洋令步賊逆戰馬賊抄我軍後慶春
戰不利遂退會二姓綏化援兵至賊北竄石灰窰四合成扼於
張萬林楊得勝李永珍各鄉團遂北入綏化境統領巴英額留
張永貴張殿文守巴彥州自率防營暨鄉練追之幫帶雙全管
帶傅岐標亦至賊且戰且走及之小銀河東岸下窖子斬賊首

黑虎十九日追至伊密吉河蘭家船口傅岐標張湖李雲山以三十人先濟賊濱河拒守槍彈雨下李雲山子母帶中彈絕紐前進如故既濟傅岐標督兵伏草間匍匐而前張湖瞋目躍馬大呼殺賊賊衆辟易小勝子天滅洋復分馬隊抄回來攻官軍巴英額雙全分兵禦之餘慶巡防李萬山聞警以兵來會衆軍益奮鏖戰竟日斬賊首孟營君賊大敗竄歐肯河李萬山將餘慶兵追之賊復竄哈喇巴山仍遁入井子荒是役也苦戰十三日賊受巨創自是不敢犯巴彥州境

七月賊入蘭西境

是月十六日匪首山崩墳河墳江擣字洗字三百人竄蘭西城南村屯投刺縣署約以午後入城管帶英順所部俱出勦城內

無兵英順示以鎮靜傳令進剿一面飛請援隊匪疑其有備不敢攻縣城獲全

八月管帶傅岐標剿賊陣亡知府李鴻桂假俄兵駐呼蘭

巨匪東洋樂打五省復竄蘭西傅岐標擊之敗賊對周家賊大奔岐標蹙之至八里荒女兒城轉心湖泥河北屢敗之生擒賊四人斃賊十餘人賊折而南至葛家網房謀渡松花江八月十四日傅岐標追及之賊匿江套柳蘆草甸中傅岐標跡之至白沙坨傷賊五人斃七人賊伏暗陬岐標不及覺中槍歿於陣岐標宿將善戰每戰必先出賊避其鋒輒引去岐標旣殞呼蘭大震知府李鴻桂請兵於哈爾濱俄官十六日俄馬步隊一營抵郡駐南倉次年四月十五日始撤防俸餉子彈外皆我供給出